



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Vvlcano Illvstri Regi Dalmatiae & Diocliae.

urn:nbn:de:hbz:466:1-20006

ABBATI DE FLORE.

Epist. 524.
Quod professio
abbatis habitu
etiam obliget.
Cap. Porrectu.
De regularibus.

Porrectum nobis ex parte tua petitorium continebat quod I. Canonicus Acheruntinus infirmitate gravatus, votum, ut fieret monachus, se asseruit emisisse. Vnde metuens ne voto decederet non completo, junctis manibus tibi se reddidit in monachum & in fratrem. Alij quoque in absentia tua sese in sacerdotum manibus monachos fieri devoventes, sani facti, ad vomitum redierunt. Et cum familiares monasterij tui antea extitissent, quia non fuerunt ad antiquam familiaritatem admissi, adversarij facti sunt pro amicis. Vtrum ergo talium facta dissimulare valeas, ne fiant deteriores, an compellendi sint ad complenda promissa, per nos postulas edoceri. Nos ergo inquisitioni tuæ taliter respondemus, quod cum monachum faciat non habitus, sed professio regularis, ex quo à convertendo emittitur, & recipitur ab Abbate, talis ut fiat monachus & reddat Domino quod promisit erit utique non immeritò compellendus. Datum ut supra.

I. CAPELLAN O
& S. Subdiacono nostris, apostolica
sedis Legatis.

Epist. 525.
Illos ad Regem
Dalmatiae Le-
gatos facit.
Vide infra epist.
511. & lib. 2.
epist. 376. C. segg.

Apostolica sedis auctoritas, quæ per diversas mundi partes plenitudinem obtinet potestatis, illius sequens vestigia qui beato Petro *Pasce oves meas* tertio replicavit, in partem sollicitudinis viros evocat providos & discretos qui gregem Domini & pabulo salutis reficiant, & viam eis æternæ felicitatis ostendant. Ad quorum siquidem auxilium, & juvamen, ut ecclesiasticæ potestatis auctoritas in sua semper maneat firmitate, cum requirit necessitas, aliquos à suo latere dirigit & transmittit, quibus legationis injungit officium exercendum. Hac itaque consideratione diligenter inducti, & carissimi in Christo filij V. illustri Regis Dalmatiæ & Diocliæ precibus inclinati, qui ut ad eum Legatos mittere deberemus instantissimè postulavit, vos, de quorum probitate nos & fratres nostri plenam fiduciam obtinemus, ad Dalmatiam & Diocliam provinciam duximus transmittendos, in provinciis ipsis vobis auctoritate præsentium legationis officium injungentes, ut quæ inveneritis corrigenda corrigatis,

destruatis & evellatis superflua & nociva, ædificetis & plantetis utilia & honesta; quatenus cum Domino dante reddetis talenta, vobis reddat is credita duplicata, & à nobis & fratribus nostris valeatis in Domino multipliciter commendari. Datum Laterani VI. Idus Januarij.

VVLCANO ILLUSTRIS REGI
Dalmatiæ & Diocliæ.

VT evidentiùs evangelica doctrina pateret, & in omnem terram, juxta verbum propheticum, sonus Apostolorum exiret, & in fines orbis terræ verba diffunderentur ipsorum, noster Dominus & magister, qui præbuit nobis exemplum ut sequamur vestigia ejus, discipulos suos per universas mundi partes ad prædicandum direxit, dicens eis juxta evangelicam veritatem: *Euntes in mundum universum, prædicate Evangelium omni creature.* Quam siquidem observantes constitutionem providam & salubrem Rom. Pontifices, Vicarij Iesu Christi, qui in beato Petro Apostolorum principe ab ipso Domino receperunt plenitudinem potestatis, & constituti sunt super gentes & regna, ut juxta verbum propheticum evellant & destruant, ædificent & plantent, quia suam non possunt ubique præsentiam exhibere, per varia mundi climata à suo latere aliquos dirigunt & transmittunt, qui fideles in fide consolident, corrigenda corrigant, de agro Domini nociva destruant, & utilia plantare procurent. Intelligentes igitur per literas tuas nostro apostolatui præsentatas tuæ devotionis ardorem, quod videlicet Rom. Ecclesiam matrem tuam super omnia post Deum diligere & honorare proponis, & mandatis nostris omnimodis inhærere, juxta quod à nobis tua nobilitas postulavit, dilectos filios Io. Capellanum & Simonem Subdiaconum nostros, de quorum scientia & probitate nos & fratres nostri plenam fiduciam obtinemus, de fratrum nostrorum consilio ad partes tuas duximus dirigendos, per apostolica tibi scripta mandantes quatenus eos tanquam apostolicæ sedis Legatos benignè recipias, & honestè pertractes, & quæ secundum Deum in partibus ipsis duxerint statuenda suscipias humiliter, & sine refragatione conserves; ut cum ad nos Domino dante redierint, nobis referre valeant tuæ de-

Epist. 526.
Vt Legatos apostolicos reverenter accipiat, & officium suum exequi permittat.

votionis affectum, & Rom. Ecclesia tuus efficacius possit intendere incrementis. Nos enim eis dedimus in mandatis ut apostolicam in te confirmantes doctrinam, reforment quidquid invenerint reformandum, & tanquam membra capiti apostolicæ sedi conforment, in ipsius devotione pariter & obedientia solidantes: per quos etiam Pallium, plenitudinem scilicet pontificalis officij, venerab. fratri nostro Dioclien. Archiepiscopo transmittimus, ut in partem nostræ sollicitudinis evocatus, sine defectu valeat officij sui debitum adimplere. Datum ut supra.

Scriptum est super hoc in eundem ferè modum uxori ejusdem Regis. In e. f. m. nobili viro S. magno Iupano. In e. f. m. uxori ejusdem S. magni Iupani.

Epist. 527.

In eundem ferè modum Dioclien. Archiepiscopo usque ad verbum adimplere. Quibus etiam pro nobis & successoribus nostris fidelitatis juramentum, quod tibi sub Bulla nostra mittimus inclusum, devotè studeas & humiliter exhibere.

Epist. 528.

In eundem ferè modum Archiepiscopis, Episcopis, Abbatibus, Ecclesiarum Prælati, & aliis Clericis per Dalmatiam & Diocliam in regno carissimi in Christo filij nostri Vulcani illustris Regis Diocliæ & Dalmatiæ constitutis, usque ad verbum solidantes.

EPISCOPO ET CAPITULO
Tripolitan.

Epist. 529.
V. Raimundo primò vacaturum canonicatum & præbendam conferant.

Cum ex apostolatus officio, quod licet indigni, suscepimus, ad universos extendere curam provisionis apostolicæ teneamur, specialius illis adesse volumus & debemus qui clericali militiæ deputantur: inter quos illos duximus non immeritò preferendos, de quorum meritis laudabilis conversatio & contracta nobiscum familiaritas, dum essemus in minori officio constituti, nos efficit certiores. Hinc est quòd dilectum filium Raimundum Clericum Ecclesiæ vestræ, quondam familiarem nostrum, universitati vestræ sollicitè commendantes, rogamus attentius, & per apostolica vobis scripta mandamus atque præcipimus quatenus eum pro reverentia beati Petri & nostræ in Canonicum vestrum & fratrem tam libenter quàm liberaliter admittatis, cum præbenda stallum eidem in choro & locum in Capitulo tan-

quam uni de vestris Canonicis, occasione, contradictione, & appellatione cessantibus, assignantes. Sic autem has primitias precum nostrarum reverenter admittere studeatis, ut devotionem vestram debeamus proinde commendare, & vos in vestris petitionibus efficacius exaudire. Alioquin venerabili fratri nostro Patriarchæ Antiocheno dedimus in mandatis ut vobis cessantibus efficere quod mandamus, ipse id, remoto appellationis obstaculo, exequatur, contradictores quoslibet ecclesiastica censura percellens. Datum Laterani II. Kal. Januarij.

Scriptum est super hoc Patriarchæ Antiocheno.

VNIVERSO CLERO
& populo Cremonensi.

Quia pietas promissionem habet vitæ quæ nunc est & futuræ, justus & misericors Dominus fideles suos, quos prædestinavit ad vitam, frequenter in hac vita glorificat, & semper in futura coronat, quibus & per Prophetam promittit: *Dabo vos in laudem, gloriam, & honorem in cunctis populis.* & per se pollicetur: *Fulgebunt iusti sicut sol in regno patris eorum.* Mirabilis enim in seipso Dominus, mirabilis in sanctis, mirabilis in omnibus operibus suis, verum nobis exhibet suæ virtutis indicium, & frigidam jam in pluribus caritatis igniculum, mirabilium suorum signis accendit, assumptis in gloriam suam qui certaverunt legitimè in hoc mundo, ad memorias eorum innovat signa, & mirabilia juxta Prophetam immutat; ut qui sanctus est apud ipsum, sanctus etiam ab hominibus habeatur; & in hoc præsertim hæreticorum confundatur perversitas, cum ad catholicorum tumulos viderint prodigia pullulare. Licet autem, juxta testimonium Veritatis, sola finalis perseverantia exigatur ad sanctitatem animæ in Ecclesia triumphanti, quoniam qui perseveraverit usque in finem, hic salvus erit; duo tamen, virtus videlicet morum, & virtus signorum, opera scilicet pietatis in vita, & miraculorum signa post mortem, ut quis reputetur sanctus, in militanti Ecclesia requiruntur. Nam quia frequenter angelus Satanae se in lucis angelum transfiguratur, & quidam faciunt opera sua bona, ut videantur ab

Epist. 530.
De S. Homoboni vita, miraculis, & canonizatione.
Vide Baronium ad diem 13. Novemb.